

Señora conselleira de Educación, Universidade e FP.

As organización sindicais que formamos parte da Mesa Sectorial de Educación vimos reclamando insistentemente a recuperación dos dereitos que lle foron arrebatados ao profesorado na última década. Un deles, e de maior preocupación entre o persoal docente, é á volta aos 18 períodos lectivos nos corpos que imparten docencia na ESO, Bacharelato, FP e ensinanza de réxime especial e 21 no corpo de mestres para os centros de Infantil, Primaria e Educación Especial.

As nosas demandas foron anteriores á modificación do Real Decreto 14/2012 que supuxo unha intervención irrespectuosa do goberno español nas competencias propias en materia de persoal docente que son propias da Xunta de Galiza. O parapeto do goberno galego para frear calquera apertura de negociacións foi precisamente o carácter de mínimos dos horarios lectivos imposto desde Madrid. Unha escusa que non usaron outros gobernos autonómicos para iniciar negociacións e mesmo chegar a acordos.

A entrada en vigor da Lei 4/2019, do 7 de marzo, de mellora das condicións para o desempeño da docencia e do ensino no ámbito da educación non universitaria supuxo definitivamente a recuperación dos horarios lectivos de miles de docentes en varias Comunidades Autónomas. Porén, a Consellaría que vostede dirixe, a través do seu Director Xeral de Centros e Recursos Humanos, tense negado reiteradamente nos últimos meses a convocar unha Mesa para negociar a recuperación do noso horario lectivo.

Como representantes do profesorado non podemos asumir que o goberno negue a devolución dun dereito masivamente reclamado por un profesorado que cargou inxustamente cos efectos dos recortes ao longo destes últimos anos.

Co convencemento firme de que o profesorado non entendería que a titular da Consellaría se negase a tratar este tema e para poder trasladarlle directamente as nosas demandas e procurar desbloquear unha situación que se agrava e se dirixe claramente a un conflito laboral pola falta de negociación da Consellaría, solicitámoslle á maior brevidade posíbel, unha reunión coas catro organizacións con representación na Mesa Sectorial.

Reciba un cordial saúdo

Santiago de Compostela, 11 de outubro de 2019.

CIG-ENSINO



CCOO-ENSINO



ANPE



FESP-UGT

